



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

20. Kalenderwoche – ab 16. Mai 2010

Sollidahridäd

So, nu hammor also jezde dähn Grieschn aus dor Scheiße raus geholfn! Jednfalls hammors erschdema vorsuchd - mid e baar Milljårdschn! So im Rahmen von dor EU.

Ogeh - friehor hammor sowas indornadsjonahle Sollidahridäd genannnd. Mor muss dähm Brudorvolg helfn. Un mir sinn nu ma jezde mid de Grieschn vorbriedord! Friehor warn mir mähr mid annre vorbriedord un ham dähn helfn missn, wennse in dor Nod warn. Da ham mir zum Beischbiel dor Sowjedunjohn Wergzeuschmaschienen gelieford un die ham uns daderfiehr ooch noch unsorn Zuggor abgenomm. Heidzudaache miss mor ehm dähn Grieschn helfn odor dähn Bankn odor dähm Obeß-Gonzern odor annorn Hilfsbedirfdischn Freindn.

Wobei - was misch e bißl gräm dud - die sinn alle dährardisch undankbar! Grade jedzde ehm ooch widdor de Grieschn. Da dun die meudorn un brodesdiern un machn Randahle in Ahdheen... direggd unnor de Oochn von dor Agrobolis! Die wolln zwar gerne unsor Schrod ham, abor die wolln nisch schbarn dafiehr! Das is doch nisch scheen!?

Isch meene, wemmor so brivad iebor de Vorhädnisse gelähbd had... so eene Zeid lang, un dann isses Gondo bledzlich un unerwarded in de Miesn gerudschd, dann dusde dir doch ooch ma dähn Girdl bißl engor schnalln, dusd e bißl schbarn beim Lugsus... - zum Beischbiel ehm beim Urlaub odor bei dor Gulduhr odor beim Bier. Ja, wemmor abgerudschd is, dud mor sisch als normalor Birschor ma e bißl einschränkn. Mor dud schbarn! Freiwillisch! Warum de Grieschn nisch ooch? Guhd, isch will ma sachn, wenn dei Gondo in de Miesn gerudschd is, weil deine Gudste sisch een Fumml nachm annorn gekoofd had... odor weilse jede Woche zum Frisöhr renn dud... was

ledzdlisch ooch nischd nidzd - dähr Kobb dud ja gleisch bleihm! Also, wenn du vellisch schuldlos an dor Griese von deim Gondo bisd... un dann sollsde schbarn... womeeschlich beim Bier!??? Nee, da däde isch nadiehrlich ooch Brodesd einleeschn. Da missde meine Gudste ershdema e bißl was ändorn in ihre Gewohnheidn! Da missde die ershdema anfang mid schbarn! Nisch isch!

Wies nu bei de Grieschn is...? Nascha, es kennde nadiehrlich sein, dass die, die da off dor Schdraße rumrandalierd ham, dass die ooch nisch schuld sinn an dor Vorschuldung. Dass die jedzde nisch schbarn wolln, wo irschendwelsche annre jahrelang das Geld gescheffld ham! Un die, die wolln das Schrod, wasse gescheffld ham, ooch nisch widdor rausriggn!

Un da kann isch de Grieschn, die nisch gescheffld ham... da kann isch die vorschdehn, wenn die jedzde offmuggn dun. Isch däde - ährlisch gesachd -, wenn ischs nisch grade ziehmlisch im Greize hädde... also, dann däde isch ooch dähn Bänkorn hierzulande un annerschwo ma zeischn, was eene Harge is! Die sinn ja ooch solsche Schefflor, die dann annre bleschn lassn dun! Wobei meine Gudste sachd, isch soll misch nisch so offreschn, das is ehm so. Das däde sissdehmimmanend sein. Ja, sissdehmimmanend? Un meine Gudste weeiß sogahr, wasse dadermid meend!

Eduard Sachsenmeyer